

niva esser a parlamento il *roy* col re di romani. Et erano za zonti in campo sier *Zustignan Morexini*, *Vicenzo di Naldo et Vitello Vitelli*, venivano il resto, ch' è sier *Nicolò Memo*, podestà di *Trevi*, sier *Andrea Morexini*, di sier *Zustignan*, sier *Piero Gradenigo*, di sier *Cabriel*, *Brazo Fortebrazo* et alcuni altri, fati presoni avanti *Trevi etc.* *Item*, il re li à concesso patente possi andar a star col signor *Bortolo etc.*; et altre cosse secrete disse che non se intese. Et de li nostri presoni, che stevano bene, *excepto* sier *Marco Dandolo*, *olim* capitano di *Brexa*, che era in destreta a *Milano*.

Di Ferara. Per frati venuti, dil capitollo fato li observanti, chome disse fra' *Francesco Zorzi*, guardian a *San Francesco* di la *Vigna*, che tutti pianze et hanno gran dolor, vedeno il mal futuro, fanno precession et sopra la piazza fo dito una messa, con solenne precession, fata avanti il partir dil ducha, et altre cosse; si che *Ferara* dubita assai. Li presoni nostri sono in castello, ben trattati. *Item*, poi se intese, per altre vie, certo il ducha et il cardinal, suo fratello, esser ritenuti dal re; et non fu vero.

Nota. In questi zorni fo suspeso le provision si feva zercha *Venexia*, e in l'arsenal le piate si lavorava, et se atendea a far galie sotil et molini; *etiam* in terra nuova, dove si lezeva, fo fato un molin.

Item, eri sera partino di qui, con do barche, fino in *Ancona* sier *Vicenzo Grimani*, di sier *Antonio*, con sier *Hironimo da Pexaro*, di sier *Fantin*, suo compagno, per andar a *Roma* per il padre.

Nota. Il cardinal *Adriano*, qual era a *Padoa*, seguito il caso, vene in questa terra, alozato secrete in caxa dil vescovo di *Baffo*, domino *Jacomo da Pexaro*, a *Santa Maria Zubenigo*, in cha' *Morexini*, con licenfa perhò di la Signoria nostra.

È da saper, eri sera achadete, cossa notanda, che nel borgo di *San Trovaxo* sta una povera dona, vedoa, con 3 fioli, dorme sulla paja, et filla lanna et nulla ha al mondo, par che a hore 1 $\frac{1}{2}$ di note batesse a la sua porta una femena; et questa, meravigliata chi bateva a quella horra, dimandato chi fosse, disse: *Apri*. Et aperta, intrò in caxa, non havia luse, ma li parsse fusse una dona, vestita di biancho, la qual li disse: Va dal piovàn et dili, che 'l faza precession fin el dì di *San Zuanne*, con la madona di *Ogni Santi*, che questa terra haverà vitoria contra i soi inimici, dicendo: Cussi ho fato far a la *Madona di San Zuane Pollo*. La qual femena disse: Chome volè vu, che vada, che i non n.e crederà, e non si vede? E lei disse: Va pur via; e parsse la fosse spen-

ta fuora, et che fosse torze accese. Andò dal piovàn, e la dona rimase in caxa, et li disse la cossa. Lo qual ordinò la venisse la matina; et tornata a caxa, la dona era partita. Et fo fato la precession, comenzata questa matina.

Item, sier *Francesco* di *Cavalli* partì di questa terra, per andar a *Verona*, con salvo conduto auto. Quel sarà scriverò.

Item, sier *Francesco* di *Garzoni*, venuto podestà di *Verona*, et do soi fratelli, sier *Vetor* et sier *Zuan* di *Garzoni*, in questi di fallite.

Da poi disnar fo pregadi, per expedir li 6 oratori vanno ozi a *Roma*, si parteno con do galie sotil fin in *Ancona*. Et leto letere di *Roma*; dil campo, di *Mestre*, di sier *Andrea Griti*, provedador; da *Castel Francò* et di *Treviso*. Chome quelli di *Treviso* hanno richiesto certa exemption di daye etc. Et li hanno risposto, si la terra sarà d' altri non pagerano, si la Signoria l'averà, scoderà con comodità etc. Unde ozi im pregadi li fo scripto et preso che siano assoluti etc.

Fo fato la commission a li oratori sopraditi, molto ampla, et vadino davanti il papa humelmente, rechiedendo perdono et dimandando l'absolutione. Et poi dolersi di la nostra fortuna; et che 'l re di *Franza* contra raxon ne è venuto a tuor il stato; e più, le terre di *Verona* in qua, mandato via li nostri rectori, hanno levato aliene insegne; et che soa santità provedi, nè voi la destruction di questa republica devota di *Santa in (sic) Chiesa*, la qual sempre per la fede christiana à combatuto contra infideli. *Item*, tratano liga, volendo il papa; et caetera secretiora. Et fo cazà i papalista. E nota, vanno con veste paonaze la prima volta a l'udientia prima dil papa. Et fu presa. *Item*, parole a' cardinali, *maxime* al *Grimani* et *Corner* et altri.

Et cussi in questa notte, a hore 5, si levono, 3 oratori per galia, *Trivixan*, *Capello* et *Pixani*, su sier *Zuan Duodo*, *quondam* sier *Piero*; *Mozenigo*, *Mali-piero* e *Donado*, su sier *Antonio Marzello*, *quondam* sier *Andrea*, et menono con l'horo cavalli ... Li in *Ancora* haverano quelli cavali di do altri oratori vieneno di *Roma*, *Pixani* et *Badoer*, qualli vieneno in desgratia dil papa, *maxime* il *Pixani*, come ho ditto.

Et venuto zoso pregadi, restono consejo di X con la zonta, non molto perhò. Et feno vice cao, in luogo di sier *Polo Capello*, cavalier, è andato orator a *Roma*, sier *Lorenzo* di *Prioli*. *Etiam* hessendo reduto pregadi, fo consejo di X con la zonta; et a far la commission fo cazà li papalista. Et ozi fo preso di